

**Go tla diragala eng ka nna fa nka palelwa ke go duela kgotsa ka emisa go duela madi a tlhokomelo kwa ntle ga mabaka ape?**

Go ka rebolwa kgatlhanong le wena taelo ya katlholo ya baagi, thebolo ya katlholo go ya ka karolo ya 27 ya molao wa tlhokomelo, mametlelelo ya lotseno go ya ka karolo ya 28 le mametlelelo ya dikoloto.

**DIPOTSO TSE DI BOTSWANG**

**KGAPETSAKGAPETSA**



**KHA RI UNDE**

**TLHOKOMELO**

### **Ke mang yo o tshwanetseng go duela madi a tlhokomelo?**

Ke patelesego ya semolao gore batsadi ba ba belegeng ngwana ka bobedi, batsadibagolo kgotsa motlhokomedi wa semolao wa ngwana ba duele madi a tlhokomelo.

### **A ke kgona go kopa tuelo ya madi a tlhokomelo mo batsadibagolong?**

Ee, madi a tlhokomelo a ka kopiwa mo batsadibagolong ba ba belegeng batsadi ba ngwana fa e le gore batsadi ga ba kgone go duela madi a tlhokomelo.

### **A madi a tlhokomelo ke maikarabelo a batsadi ba ba belegeng ngwana fela?**

Nnyaa, motho mongwe le mongwe yo o nang le maikarabelo a go godisa ngwana, ke go re, motlamedi wa semolao, batsadi ba ba tlhokometseng ngwana le batsadibagolo ba ngwana, fa e le gore batsadi ba ba belegeng ngwana ga ba kgone go duela madi a tlhokomelo.

### **Goreng ke tshwanetse go duela madi a tlhokomelo?**

O tshwanetse go duela madi a tlhokomelo a go tshela sentle le kgodiso e e siameng ya ngwana, mme se se akaretsa tlamelo ya dijo, diaparo, lefelo la bodulo, tlhokomelo ya kalafi le thuto.

### **A go a patelesega go duela madi a tlhokomelo?**

Ee, go a patelesega go duela madi a tlhokomelo.

### **O tshwanetse go tsenya ngongorego ya madi a tlhokomelo kwa kae?**

Kwa kgotlatshekelong nngwe le nngwe ya magiseterata ya selegae ya kwa lefelong le motsenyakopo le/ngwana ba dulang kwa go lona.

### **A nka ya kwa kgotlatshekelong ya magiseterata nngwe le nngwe mo nageng go tsenya kopo ya madi a tlhokomelo?**

Ee, o ka ya kwa kgotlatshekelong ya magiseterata nngwe le nngwe kwa lefelong le wena le/kgotsa ngwana le dulang kwa go lona.

### **Madi a tlhokomelo a tshwanetse go duelwa gantsi go le kana kang?**

Madi a tlhokomelo a tshwanetse go duelwa kgwedi le kgwedi ka letlha le go dumelanweng ka lona ke batho ka bobedi le ka letlha le le rebotsweng ke kgotlatshekelo.

### **Madi a tlhokomelo a a tshwanetseng go duelwa ke bokae?**

Madi a tlhokomelo a a tshwanetseng go duelwa a tla tlhotlhomisiwa ke ditlhokego tsa ngwana le mekgwa e batsadi ba itirelang le go bona tšhelete ka yona.

### **O tshwanetse go emisa go duela madi a tlhokomelo ka dingwaga dife?**

Madi a tlhokomelo a tshwanetse go duelwa go fitlhela ngwana a kgona go itlamela.

### **Go diragala eng fa motho yo o tshwanetseng go duela madi a tlhokomelo ya ngwana a tlhokafala?**

Madi a tlhokomelo a tshwanetse go duelwa go tswa mo letloleng la boswa la motsadi yo o tlhokafetseng, e le go duelela tlhokomelo ya mo nakong e e tlang.

### **Go diragala eng fa ngwana a tshwara dingwaga tsa 18 mme a sa ntse a sa kgone go itlamela?**

Tuelo ya madi a tlhokomelo e tla tswela go fitlhela ngwana a kgona go itlamela. Le fa go ntse jalo, dituelo tsa madi a tlhokomelo di tshwanetse go duelwa ka tipositi ka tlhamalalo mo akhaontong ya ngwana ya banka.

### **A ke kgona go oketsa/fokotsa selekano sa madi a tlhokomelo morago ga taelo e se na go rebolwa?**

Ee, o ka nna wa kopa koketso/phokotso ya madi, segolo bogolo fa maemo a ditšhelete a fetogile.

### **Ke ditokomane dife tse ke di tlhokang go tsenya kopo ya tuelo ya madi a tlhokomelo?**

Lekwaloitshupo, setifikeite sa matsalo sa ngwana, diteitemente tsa banka tsa batsadi ka bobedi, lenaane la ditshenyegelo tsa ngwana, lenaane la ditshenyegelo tsa batsadi, jj.

### **A ke kgona go kopa tuelo ya madi a tlhokomelo fa ke nna le ntate/mme wa ngwana?**

Ee, o ka nna wa tsenya kopo ya tuelo ya madi a tlhokomelo fa motsadi yo mongwe a sa tseye maikarabelo a go tlhokomela ngwana.